

醫說卷第十

宋張杲原著

明王肯堂重輯

小兒

小方

孫思邈千金方曰小兒六歲以下黃帝無說中古有
巫妨始撰顛顛經以占壽夭自茲始有小方則小兒
方藥始於巫妨也

善醫小兒

杜任郎中善醫里人王奉職宗簡時任於汶陽時有
郡人孟生家甚溫厚惟一子方數歲抱疾他醫數人

治之無驗召任治之數日而良已踰月而平復人詢
任曰君以何藥主之任語之故其人驚曰公所言皆
藥之至溫者也他人不取君用之能起其疾其義可
聞乎任曰孟生富家也而衆醫皆用犀珠金銀主之
其性至涼多則寒其胃又從而投之由是多不喜食
日益羸瘠則潰其元失其本矣吾之劑先溫其胃使
其飲食如故然後攻其他疾是以先壯其本而無失
者焉又知杜君之善醫也如此

青箱
雜記

瘡豆禁雞鴨子

療病豌豆瘡欲無癰頻搗去痂勿令隱肌乃不成癰

縱揭傷有微血但以面膏塗無苦也瘡家不可食雞
鴨卵卽時旨瞳子如卵白其應如神不可不戒良方

小兒夜啼

井口邊草主小兒夜啼母第薦下勿令知之

酉陽雜俎

小兒不可食雞

養生論曰雞肉不可令小兒食食之令生虵蠱又令

體消瘦

杜陽雜編

治兒語遲

社壇餘胙酒治孩兒語遲以少許喫吐酒噴屋四角

辟蚊蟲

本草

兒得母寒下痢

東陽陳叔山小兒一歲得下痢嘗先啼日以羸困問
華佗佗曰其母懷軀陽氣內養乳中虛冷兒得母寒
故令不時愈佗與四物女萎丸十日卽除

魏志

小兒感冷身熱

有小兒感冷身大熱惡寒此有表證用發汗藥汗出
遂涼過一日復熱醫謂表解裏未解驗之服四順飲
子利動臟腑一行遂涼隔一日又再熱醫云經熱未
解驗之小便赤故知心熱未解服生氣湯遂涼過三
日又熱其家無所措手醫曰脉已和非病也旣發汗

又利大小便其兒已虛陽氣無所歸皆是於表所以身熱以和胃氣藥如六神散之類加烏梅煎令微覺有酸味收其陽氣歸自此全愈

小兒糞青

此脾虛生風之證也脾屬土其色黃糞黃則是脾家正色今乃青肝木尅脾也肝屬木其色青肝盛脾虛受肝之尅故糞青也當用益脾去風藥如半硫丸加白附子蝎稍可以治之雖然小兒青糞拋下便青者是風冷也良久然後青者非病也小兒糞自然如此

小兒因患泄瀉或痢氣服藥瀉之却患咳嗽治得咳嗽少愈已五六歲脚弱不能行師曰脾傳肺故咳嗽肺傳腎故不能行脾屬土土生金金生水故傳之腎腎主腰脚故不能行因用猪腰子煎汁服五疳保童丸半月遂能行

小兒得地氣方行

小兒未曾行能坐不可常常抱在手中可以入坐車能獨坐春夏坐於地上寒則以薦蓆襯之人得地氣方能行惜之過當常抱持之所以當行而不能行也萬物非土不生故小兒亦要得地氣也

以上醫錄

小兒初生畏寒

小兒初生候浴水未得且以綿絮包裹抱大人懷中
暖之及浴了亦當如此雖暑月亦未可遽去綿絮漸
漸去之乍出母腹不可令冒寒氣也預煎下沸湯以
器收之臨時漸暖不犯生水則兒不生瘡以此一月
爲佳

小兒初生回氣

小兒初生氣欲絕不能啼者必是難產或冒寒所致
急以綿絮包裹抱懷中未可斷臍且將胞衣置炭火
爐中燒之仍燃大紙燈蘸油點之於臍帶上往來徧

帶燎之蓋臍帶連兒臍得火氣由臍入腹更以熱醋湯將洗臍帶須更氣回啼哭如常方可浴洗了卽斷臍帶

小兒初生服藥

小兒初生急以綿裹指拭盡口中惡血若不急拭啼聲一出卽入腹成百病矣亦未須與乳且先與拍破黃連浸湯取濃汁調朱砂細末抹兒口中打盡腹中舊屎方可與乳兒若多睡聽之勿強與乳則自然長而少病

小兒初生通大小便

小兒初生大小便不通腹脹欲絕者急令婦人以溫水先嗽口了吸咂兒前後心并臍下手足心共七處每一處凡三五次嗽口吸咂以紅赤爲度須臾自通不爾無生意有此證遇此法可謂再生

小兒夜啼有四證

小兒夜啼有四證一曰寒二曰熱三曰重舌口瘡四曰客忤寒則腹痛而啼面青白口有冷氣腹亦冷曲腰而啼此冷證也熱則心躁而啼面赤便赤口中熱腹暖啼時或有汗仰身而啼此熱證也若重舌口瘡則要乳喫口到乳上便啼身額皆微熱急取燈照口

若無瘡舌必腫也客忤者見生人氣忤犯而啼也

小兒傷乳食發熱

小兒傷乳及食者或時發熱熱有退時退熱後但肚熱或夜間熱者此傷乳食也其糞有酸臭氣異常千金紫丸主之

小兒發熱治法

小兒積熱者表裏俱熱則遍身皆熱頰赤口乾小便赤大便焦黃先以清涼四順飲子利動臟腑熱則去既去復熱者裏熱已解而表熱未解也當用惺惺散或紅綿散內加麻黃微發汗表熱乃去表熱去後又

發熱者何也世醫到此盡不能曉或再用涼藥或再解表或以謂不可醫誤致夭傷者甚多此表裏俱虛氣不歸元而陽浮於外所以再發熱非熱證也只用六神散入粳米煎和其胃氣則收陽氣歸內身體便涼熱重者用銀白散

小兒血熱

小兒血熱者每旦食後發熱夜則涼世醫多謂虛勞或謂疳熱此血熱也宜用猪膽丸

急慢驚風

小兒發癇俗云驚風有陰陽證因身熱面赤而發搐

搦上視牙關緊硬者陽證也因吐瀉或只吐不瀉日漸面色白脾虛或冷而發驚不甚搦微目上視手足微動者陰證也陽證用涼藥陰證用溫藥不可一槩作驚風治也又有一證欲發瘡疹先身熱驚跳或發搐搦此非驚風當服發散藥

小兒吐瀉用藥

小兒暑月多吐瀉其證不一宜詳審用藥不可差謬有伏暑吐瀉小水必不利宜服五苓散香薷飲有傷食吐瀉者其吐及糞皆有酸臭氣宜服感應丸三方易知今不復載瀉多日口唇白及糞色亦白及瀉糞

頗多者因而成冷也宜以前方六神散每二錢匕加附子末一錢匕煎作三四服以防變痢也

小兒瀉痢

小兒暑月多瀉者一則伏暑心藏熱小水不利清濁不分因成泄瀉可服五苓散或大順散二藥皆用沸湯調若小水快而瀉者冷瀉也宜於六神散內加附子煎服若肚大瀉色白者痺瀉也宜服官局六神丸瀉者不可急以熱藥止之若以熱藥止之便變成痢凡病痢者皆因有積赤痢熱積也白痢冷積也赤白痢冷熱不調之積也赤多白少者熱多而冷少也白

多赤少者冷多而熱少也

小兒解顱

小兒解顱曾有人作頭巾與裹遮護之久而自合亦良法也

瘡疹

小兒生未有不發瘡疹自一歲至十歲至十二三歲須發一次家有數小兒一兒病此餘卽次第皆及之便當防慎其證有身熱頭痛如傷寒狀但不惡風唯惡熱所以異於傷風者唇紅尻骨及耳尖皆冷或腹痛眼澁及口舌皆痛腹痛者腹中先出眼澁者眼

先出咽喉及口舌痛者皆先有瘡也或如沙如粟米狀或爲癰疹如風泛狀皆其證也熱輕者瘡亦輕熱重者瘡亦重方其身熱時瘡未出直待身涼方出亦不可不知其未出亦須服藥唯是認得證候分明以投湯劑庶不悞人性命也未出時只可服升麻湯紅綿散地龍散消毒飲此皆平平藥或見兒身不甚熱卽飲少酒熱甚者不可飲酒

瘡疹有表裏證

小兒瘡疹有表裏證其瘡皮不薄如赤根白頭漸漸赤腫而有膿差遲者謂之木豆此裏證發於臟也其

瘡皮薄如水泡破卽易乾者謂之水豆此表證發於
腑也發於臟者重發於腑者輕熱重者至有見鬼神
目上視發搐搦如驚癇之狀世人誤認驚癇投以冷
藥無不爲害者不可不慎也如覺熱大盛涎壅平平
藥不可攻者宜以雄黃解毒丸利之以減其毒須遍
身以燈照子細看覷如未有紅點子出者可下之既
出則不可利恐蓄伏也

瘡疹黏衣用牛糞

小兒瘡疹出了變身潰膿沾黏衣衾睡卧不得者用
臘月黃牛糞日乾燒灰鋪一寸許在床上令卧之其

間瘡有大成片無皮及有成豆癰者皆用牛糞灰摻之卽愈

剝瘡痂免成癥

小兒面上瘡子纔膿出急以真酥潤之頻潤爲佳纔有瘡痂急剝去更潤之痂硬不落有礙肉生遂成癥子此理昭然人多不曉反謂剝早成癥甚誤也

瘡疹不可洗面

小兒瘡疹不可洗面生水入眼卽損眼也唯要忌口止可食粥及鯽魚青魚鰻子之類餘魚及猪羊肉皆不可食恐損眼也